

cum aut Macedoniam essent : vixque libertatem Ecclesia sub Constantino adeptæ sit , quod statim hæc regio ab Attila penitus devastata fuerit , qui vicos passim & oppida igne consumens , omnes cædens , sacra & prophana æquè diruens , nec ætati nec sexui usquam parcens , omnem regionem sanguine tinxit , ululatibusque complevit : tandem Ecclesias & altaria evertit , sedesque Episcopales penè omnes abolevit. Hac ex ratione vix quidquam certi de provinciarum Ecclesiasticarum distinctione perspicere potest , vixque ullorum Episcoporum Pannoniæ mentio fit , ab eo usque ad tempora Stephani Hungariæ Regis , qui Astrici & discipulorum ejus opera , Hungaros ad Christum convertit : multosque Episcopatus fundavit , ac inter eos Strigoniæ Metropolitæ sedem esse à summo Pontifice obtinuit.

NOTITIA ANTIQUA EPISCOPATUUM ILLYRICI

OCCIDENTALIS.

PANNONIA INFERIOR SEU SECUNDA, ET SAVIA.

SIRMIUM Ammiano lib. 15. hodie *Sirmich* , totius Illyrici Metropolis. *Photinus* ibi Ecclesiis præfuit , ut loquitur Socrates lib. 2. c. 14. & 24. Illiusque Ecclesiæ Antistes dogma , quod separatim excogitaverat , palam divulgare conatus est : unde cum tumultus ex hoc oriretur , Imperator Concilium Episcoporum Sirmii convocari jussit , quo hunc Episcopatu abdicarunt. Sed & *Germanum* Sirmii Episcopum nominat Sozomenus lib. 4. cap. 14.

MURSA Æthico in Cosmographia , vulgò *Essek*. *Valens* Mursorum Episcopus dicitur apud Socratem lib. 1. cap. 20. iisque annumeratur , qui , ut ait , contra Athanasium quasi aciem instruxerunt : quique , Theodoro teste lib. 2. cap. 8. in Concilio Sardicensi de Episcopatus gradu dimotus est.

CURTA Antonino in Itinerario , vulgò *Curta* adhuc , pagus Hungariæ circa Danubium. *Crescens* hujus Episcopus primis sæculis legitur apud Lazium lib. 2. de Repub. Romana , de cujus authoritate Lectori judicium sit.

NOVIODUNUM Antonino in Itinerario , civitas Saviæ , apud quam sedem fuisse Episcopalem sub Arcadio & Honorio testatur Lazius ibid. sed nullum hujus Episcopum nominat.

CARPIS Ptol. lib. 3. cap. 16. vulgò *Carpen*. *Secundum* hujus Episcopum fuisse sub Decio tradit Lazius ibidem.

CIBALIS Zosimo lib. 2. hodie *Palma*. *Eusebius* hujus Episcopus passus est sub Diocletiano Imperatore , ex gestis sancti Pallionis Martyris , & *Donatus* sub Decio fuit , teste Lazio.

STRIDON D. Hieronymo , cujus patria fuit , vulgò *Sdrigna*. *Domnus* Stridonensis Episcopus subscripsit Concilio Nicæno primo.

SISCIA Æthico in Cosmographia , vulgò *Sissech*. *Constantius* Episcopus Siscianensis legitur in Concilio Aquileiensi sub Damaso.

SINGIDONUM urbs Pannoniæ inferioris Aurelio Victori in Historia Imp. vulgò *Sigetincz* Lazio. *Ursacius* hujus Episcopus dicitur apud Socratem lib. 1. cap. 20. qui civitatem illam constituit in Pannonia superiori , sed mendosè. An autem differat à Singiduno , cujus situs est in confinibus Mœsiæ superioris , & Pannoniæ inferioris , alii aliter sentiunt. Ego eandem civitatem fuisse ex hoc conjicio , quod idem *Ursacius* etiam dicatur Episcopus Singidoni-